



REPUBLIKA E SHQIPËRISË
Kuvendi

PROJEKT LIGJ

Nr. _____ 2016

PËR

DISA NDRYSHIME DHE SHTESA NË LIGJIN NR.9376,
DATË 21.4.2005, “PËR SPORTIN”, TË NDRYSHUAR

Në mbështetje të neneve 78 dhe 83, pika 1, të Kushtetutës, me propozimin e Këshillit të Ministrave, Kuvendi i Republikës së Shqipërisë

V E N D O S I:

Në ligjin nr.9376, datë 21.4.2005, “Për sportin”, të ndryshuar, bëhen këto ndryshime dhe shtesa:

Neni 1

Kudo në ligj, emërtimet “Ministria e Turizmit, Kulturës, Rinisë dhe Sporteve” dhe “Ministri i Turizmit, Kulturës, Rinisë dhe Sporteve” zëvendësohen përkatësisht me “ministra përgjegjëse për sportin” dhe “ministri përgjegjës për sportin”.

Neni 2

Pas pikës 16, të nenit 3, shtohen pikat 17, 18, 19, 20 dhe 21, me këtë përmbajtje:

“17. “Sportistë të nivelit të lartë”, persona që praktikojnë sistematikisht dhe në mënyrë të organizuar sportin, duke marrë pjesë në veprimtari sportive dhe duke arritur rezultate të larta në aktivitete kombëtare dhe ndërkombëtare.

18. “Terren sportiv”, çdo mjedis apo sipërfaqe e hapur, në të cilën ushtrohet aktivitet sportiv.

19. “Ambient sportiv”, çdo ambient ose pjesë e një ndërtese apo hapësirë e mbyllur rreth saj, që shërben për veprimtari sportive.

20. “Instruktor”, specialisti i sportit që jep mësim për të përvetësuar një mjeshhtëri të caktuar, në drejtimin e një stërvitjeje sportive.

21. “Trajner”, profesionisti i përgatitur në fushën e trajnimit sportiv, i cili stërvit një individ apo ekip dhe e përgatit atë për garim apo ndeshje.”.

Neni 3

Neni 6 ndryshohet, si më poshtë vijon:

“Neni 6

Edukimi fizik dhe sporti në sistemin arsimor

1. Sporti është pjesë përbërëse e programit të edukimit të nxënësve dhe studentëve në institucionet arsimore publike e jopublike.
2. Edukimi fizik në arsimin parauniversitar është pjesë e kurrikulës bërthamë dhe kurrikulës me zgjedhje të planit mësimor. Edukimi fizik në kurrikulën bërthamë zhvillohet me minimumin 3 orë mësimore në javë për klasat 1-12. Përjashtimet nga ky rregull përcaktohen nga ministri përgjegjës për arsimin, ndërsa për arsimin profesional nga ministri përgjegjës për arsimin dhe ministri përgjegjës për arsimin profesional. Në arsimin universitar edukimi fizik përcaktohet në aktet e brendshme të vetë institucioneve të arsimit të lartë.
3. Të gjitha institucionet qendrore dhe njësitë e qeverisjes vendore krijojnë kushtet e nevojshme që nxënësit, studentët, efektivat e policisë dhe të Forcave të Armatosura të zhvillojnë veprimtari fizike dhe sportive, individuale dhe/ose të organizuara.
4. Përveç disiplinës mësimore të përfshirë si pjesë të kurrikulës, aktivitetet sportive në institucionet arsimore parauniversitare dhe universitare, jashtë procesit mësimor, organizohen edhe nga shoqatat sportive shkollore dhe shoqatat sportive universitare, të cilat mund të jenë të një sporti ose të shumë sporteve, aktiviteti i të cilave koordinohet sipas përkatësisë nga federata të sportit shkollor dhe sportit universitar.

5. Shkollat sportive janë institucione arsimore të arsimit të mesëm të lartë me orientim sportiv të të nxënësve. Pranimi në shkollat e arsimit të orientuar bëhet sipas kritereve dhe procedurave që përcaktohen me akte ligjore dhe nënligjore.
6. Të gjitha institucionet arsimore parauniversitare dhe universitare, publike ose jopublike, zbatojnë standardet në fuqi për zhvillimin e orës mësimore të edukimit fizik dhe sporteve për nxënësit dhe studentët.”.

Neni 4

Pika 5, e nenit 7, ndryshohet, si më poshtë vijon:

“5. Ndihamat apo sponsorizimet me materiale dhe pajisje sportive për organizatat sportive shqiptare, të cilat vijnë nga institucione ndërkombëtare apo çdo formë tjetër sponsorizimi në kuadër të bashkëpunimit, nxitjes së sportit dhe rritjes së nivelit të sportit në rang ndërkombëtar, përjashtohen nga detyrimet doganore dhe tatimi mbi vlerën e shtuar.”.

Neni 5

Titulli i kreut III ndryshohet dhe zëvendësohet me “Këshilli i Lartë i Sportit”.

Neni 6

Neni 9 ndryshohet, si më poshtë vijon:

“Neni 9

1. Këshilli i Lartë i Sportit është organ këshillimor pranë ministrit përgjegjës për sportin, i cili merr pjesë në hartimin dhe zhvillimin e politikave për sportin.
2. Përbërja strukturore dhe shpërblimi i anëtarëve të Këshillit të Lartë të Sportit përcaktohen me vendim të Këshillit të Ministrave.
3. Ministri përgjegjës për sportin është kryetar i Këshillit të Lartë të Sportit dhe emëron anëtarët e tij. Ministri përgjegjës për sportin miraton rregulloren e organizimit e të funksionimit të Këshillit të Lartë të Sportit.”.

Neni 7

Pika 2, e nenit 10/1, ndryshohet, si më poshtë vijon:

“2. Ministria përgjegjëse për sportin mbikëqyr dhe kontrollon administrimin e grantit të buxhetit të shtetit në të gjitha organizatat sportive që kanë përfituar nga fondet publike.”.

Neni 8

Neni 11 ndryshohet, si më poshtë vijon:

“Neni 11

“Komiteti Olimpik Kombëtar Shqiptar

1. Komiteti Olimpik Kombëtar Shqiptar është person juridik, që organizohet dhe funksionon në zbatim të kuadrit ligjor për organizatat jofitimprurëse dhe ushtron veprimtarinë në përputhje me Kartën Olimpikë dhe statutin e tij, të miratuar nga ministri përgjegjës për sportin, përpara kërkesës për regjistrim në gjykatën kompetente.
2. Ndryshimet staturore miratohen nga ministri përgjegjës për sportin brenda 60 ditësh nga data e depozitimit. Pas kalimit të këtij afati, ndryshimet staturore konsiderohen të miratuara në heshtje. Pas përfundimit të kësaj procedure, ndryshimet staturore regjistrohen në gjykatë.
3. Komiteti Olimpik Kombëtar Shqiptar mund të financohet me fonde të dhëna nga buxheti i shtetit në formë granti, si dhe burime të tjera të ligjshme.
4. Ministria përgjegjëse njih vetëm një Komitet Olimpik Kombëtar Shqiptar dhe asnjë organizatë tjetër nuk mund të ushtrojë atributet e këtij Komiteti.
5. Në Komitetin Olimpik Kombëtar Shqiptar aderojnë federatat shqiptare, organizata të tjera sportive dhe persona juridikë dhe fizikë, të cilët plotësojnë kushtet e përcaktuara në statutin e këtij Komiteti.
6. Vendimet e Komitetit Olimpik Kombëtar Shqiptar bëhen publike, nëpërmjet dërgimit zyrtar të gjithë anëtarëve të tij.”.

Neni 9

Neni 14 ndryshohet, si më poshtë vijon:

“Neni 14
Federatat sportive

1. Federata Shqiptare është person juridik që organizohet dhe funksionon në zbatim të kuadrit ligjor për organizatat jofitimprurëse dhe ushtron veprimtarinë në një sport të caktuar në përputhje me statutin e saj, të miratuar nga ministri përgjegjës për sportin brenda 60 ditësh nga data e depozitimit, përpara kërkesës për regjistrim në gjykatën kompetente. Pas kalimit të këtij afati, statuti konsiderohet i miratuar në heshtje.
2. Federata sportive pas titullit të përkatësisë duhet të shënojë emërtimin “Federatë shqiptare”.
3. Të drejtën për të përfituar emërtimin “Federatë shqiptare” e një sporti të caktuar e gëzon ajo organizatë sportive, e krijuar me nismën e personave juridikë, personave fizikë dhe klubeve sportive të atij sporti, që kanë pranuar emërtimin dhe statutin e federatës. Pas përfundimit të kësaj procedure, statuti i miratuar regjistrohet në gjykatë.
4. Ministria përgjegjëse për sportin njih vetëm një federatë në një sport të caktuar dhe asnjë organizatë tjetër nuk mund të ushtrojë atributet e kësaj federate.
5. Kërkesat e personave juridikë, personave fizikë dhe klubeve sportive të atij sporti për anëtarësim në federatë merren në shqyrtim në mbledhjen e parë të organeve përkatëse të federatës. Vendimi i organeve përkatëse të federatës duhet të jetë i arsyetuar. Kundër vendimit për anëtarësim mund të paraqitet ankim pranë Këshillit të Arbitrazhit Sportiv.
6. Ndryshimet statuto-re miratohen nga ministri përgjegjës për sportin sipas së njëjtës procedurë që miraton edhe statutin.
7. Federatat shqiptare gëzojnë të drejtën për t’u anëtarësuar në organizata të tjera sportive të nivelit më të lartë, brenda dhe jashtë vendit.
8. Vendimet dhe veprimtaritë sportive të federatave sportive shqiptare bëhen publike nëpërmjet dërgimit zyrtar të gjithë anëtarëve të saj.
9. Personat me aftësi të kufizuara mund të themelojnë federatën e tyre.”.

Neni 10

Pikat 2 dhe 3, të nenit 15, ndryshohen, si më poshtë vijon:

- “2. Akti i emërimit “Federatë shqiptare” të një sporti të caktuar jepet nga ministri përgjegjës për sportin, pas opinionit të marrë nga Komiteti Olimpik Kombëtar Shqiptar. Komiteti Olimpik Kombëtar Shqiptar paraqet opinionin jo në vonë se 15 ditë nga dita e marrjes së njoftimit.
3. Akti i emërimit “Federatë shqiptare” e një sporti i revokohet një organizate sportive dhe ministria përgjegjës për sportin kërkon nga gjykata kompetente heqjen e emërimit “Federatë shqiptare” nëse:
 - a) veprimtaria e saj nuk zhvillohet në përputhje me qëllimet dhe objektivat e përcaktuar në statut;
 - b) asambleja e përgjithshme e saj merr vendime në kundërshtim me ligjin;
 - c) pushon së funksionari, si rezultat i shpërbërjes së saj.”.

Neni 11

Neni 16 ndryshohet, si më poshtë vijon:

“Neni 16

1. Federata shqiptare e një sporti të caktuar, krahas detyrave statutore, ka edhe këto detyra:
 - a) Të organizojë, të drejtojë, të kontrollojë dhe të vëzhgojë aktivitetet sportive zyrtare në nivel kombëtar, në bazë të rregulloreve të miratuara;
 - b) Të organizojë kampionatin kombëtar dhe të shpallë ekipin “Kampion Kombëtar” në sportin përkatës;
 - c) Të organizojë Kupën e Shqipërisë dhe të shpallë fituesin e “Kupës së Shqipërisë” në sportin përkatës;
 - ç) Të marrë masa për parandalimin dhe të luftojë dhunën, si dhe të promovojë sportin e pastër dhe tolerancën;
 - d) Të përdorë simbolet e federatës ose të autorizojë përdorimin e tyre nga anëtarë të tjerë, për çdo qëllim;
 - dh) Të organizojë ekipin kombëtar dhe të marrë pjesë në veprimtaritë sportive ndërkombëtare ose të autorizojë pjesëmarrjen e anëtarëve të saj në këto veprimtari;
 - e) Të organizojë aktivitete zyrtare me karakter ndërkombëtar në Republikën e Shqipërisë me miratimin e ministrisë përgjegjëse për sportin.

2. Asnjë person juridik, privat ose publik, nuk mund të ushtrojë asnjë nga kompetencat ekskluzive të federatës, vetëm nëse ato i janë dhënë zyrtarisht prej saj.”.

Neni 12

Neni 19 ndryshohet, si më poshtë vijon:

“Neni 19 Klubet sportive”

1. Klubet sportive organizohen dhe funksionojnë, sipas legjislacionit në fuqi për tregtarët dhe shoqëritë tregtare ose për organizatat jofitimprurëse.
2. Institucionet shtetërore kanë të drejtë të krijojnë klube sportive të një ose shumë sporteve, të cilat kanë personalitet juridik dhe organizohen e funksionojnë në bazë të aktit themelues të organit krijues.
3. Procedurat e transformimit të klubeve realizohen me vendim të organit krijues brenda një periudhe kohore prej 6 muajsh nga hyrja në fuqi e këtij ligji.”.

Neni 13

Neni 22 ndryshohet, si më poshtë vijon:

“Neni 22 Zgjidhja e mosmarrëveshjeve

1. Çdo anëtar i Komitetit Olimpik Kombëtar Shqiptar ka të drejtën e ankimit për vendimet e organeve drejtuese dhe mosmarrëveshjet, përpara Këshillit të Arbitrazhit Sportiv pranë Komitetit Olimpik Kombëtar Shqiptar.
2. Të drejtat, detyrat dhe mënyra e emërimit të anëtarëve të Këshillit të Arbitrazhit Sportiv, funksioni dhe kompetencat për të cilat ai shprehet dhe merr vendim përcaktohen në rregulloren e tij, e cila miratohet në Asamblenë e Përgjithshme të Komitetit Olimpik Kombëtar Shqiptar me shumicë të cilësuar të anëtarëve.
3. Arbitrat anëtarë të Këshillit të Arbitrazhit Sportiv zgjidhen me shumicë të thjeshtë nga Asambleja e Komitetit Olimpik Kombëtar Shqiptar dhe

shkarkohen me shumicë të cilësuar të votave të anëtarëve të Asamblesë së Komitetit Olimpik Kombëtar Shqiptar.

4. Këshilli i Arbitrazhit Sportiv funksionon në bazë të rregullores së brendshme dhe Kodit të Proceduarve Civile.”.

Neni 14

Neni 26 ndryshohet, si më poshtë vijon:

“Neni 26

Sporti dhe statusi i sportistit të nivelit të lartë

1. Sporti i nivelit të lartë është një faktor vendimtar për zhvillimin e sportit në planin kombëtar, si dhe luan një rol të rëndësishëm në përfaqësimin e Shqipërisë në veprimtari sportive ndërkombëtare.
2. Njësitë e qeverisjes qendore dhe njësitë e qeverisjes vendore sigurojnë dhe mbështetin trajtimin, shpërblimin dhe integrimin në sistemin arsimor, social dhe profesional të sportistëve të nivelit të lartë, të cilët kanë arritur rezultatet “rekord olimpik”, “rekord botëror”, “rekord evropian”, “vendi i parë deri në të tetin në lojërat olimpike”, “vendi i parë deri në të pestin në kampionate botërore” dhe “vendi i parë deri në të tretin në kampionate evropiane”, “vendi i parë në lojërat mesdhetare” në aktivitetet ndërkombëtare zyrtare.
3. Mënyra e shpërblimit të sportistëve që arrijnë kriteret e statusit të sportistit të nivelit të lartë dhe përfitimi i trajtimit për përgatitjen sportive përcaktohen me vendim të Këshillit të Ministrave.
4. Institucionet arsimore publike, me drejtim sportiv, siguri kombëtare dhe mbrojtje, sigurojnë kryerjen e studimeve për sportistët, të cilët plotësojnë kriteret e përfitimit të statusit të sportistit të nivelit të lartë, pa konkurs dhe sipas një plani individual.”.

Neni 15

Pas nenit 31, të kreut VIII, shtohet neni 31/1, me këtë përmbajtje:

“Neni 31/1

1. Destinacioni i objekteve sportive nuk mund të ndryshojë, pavarësisht pronësisë apo subjektit administrues.

2. Objektet sportive jepen me koncesion apo privatizohen, me kusht që të mos u ndryshojë destinacioni.”.

Neni 16

Neni 37 ndryshohet, si më poshtë vijon:

“Neni 37 Fondi Kombëtar i Zhvillimit të Sportit”

Pranë ministrisë përgjegjëse për sportin krijohet Fondi Kombëtar i Zhvillimit të Sportit nga të ardhurat, që sigurohen nga lotaritë sportive, sipas kuadrit ligjor në fuqi për lojërat e fatit. Përdorimi i Fondit Kombëtar të Zhvillimit të Sportit bëhet me urdhër të ministrit përgjegjës për sportin, sipas udhëzimit të nxjerrë prej tij në zbatim të këtij ligji.”.

Neni 17

Neni 46 shfuqizohet.

Neni 18

Pika 2, e nenit 48, ndryshohet, si më poshtë vijon:

“2. Gjatë veprimtarive sportive, personat, në cilësinë e përfaqësuesit të federatave, arbitrave, gjyqtarëve dhe vëzhguesve, janë të paprekshëm.”.

Neni 19

Në nenin 50 bëhen këto ndryshime:

1. Pika 1 ndryshohet, si më poshtë vijon:

“1. Komisioni Kombëtar Kundër Dhunës në Sport është një organ këshillimor pranë ministrit përgjegjës për sportin, i cili harton politika për parandalimin e dhunës gjatë aktiviteteve sportive dhe shfaqjeve sportive. Përbërja, funksionimi, kompetencat dhe mënyra e shpërblimit të anëtarëve të këtij komisioni përcaktohen me vendim të Këshillit të Ministrave.”.

2. Pika 2 shfuqizohet.

Neni 20

Pas nenit 51/1 shtohet neni 51/2, me këtë përmbajtje:

“Neni 51/2

1. Dënohen me gjobë, në shumën nga 100 000 deri në 500 000 lekë, organizatat sportive dhe anëtarët e tyre në rast se:
 - a) kryejnë veprimtari sportive pa marrë më parë pëlqimin nga organi përgjegjës, në të cilin janë të anëtarësuar;
 - b) organizojnë ose bëjnë propagandë politike e fetare.
2. Gjobat vendosen nga komisionet e disiplinës së organizatave sportive dhe derdhen 100 për qind në buxhetin e shtetit. Dënimi me gjobë mund të shoqërohet edhe me masa të ndalimit të ushtrimit të veprimtarisë sportive për një periudhë kohore nga 6 muaj deri në një vit. Masat shoqëruese jepen nga komisionet disiplinore të federatave përkatëse.”.

Neni 21

Aktet nënligjore

1. Ngarkohet Këshilli i Ministrave që, brenda 6 muajve nga hyrja në fuqi e këtij ligji, të miratojë aktet nënligjore në zbatim të neneve 6, 14 dhe 19.
2. Ngarkohet ministri përgjegjës për sportin që, brenda 6 muajve nga hyrja në fuqi e këtij ligji, të miratojë aktet nënligjore në zbatim të nenit 16.

Neni 22

Hyrja në fuqi

Ky ligj hyn në fuqi 15 ditë pas botimit në “Fletoren zyrtare”.

K R Y E T A R I

ILIR META